



Inatsisartunut ilaasortaq
Astrid Fleischer Rex, Demokraatit

Svar på § 37 spm vedr. børn i krisecentre KAL

18. september 2012
Sagsnr. 2012-072631
Dok.nr. 1016184

Asasara Astrid Fleischer Rex

Postboks 260
3900 Nuuk

Qimarnguitsinni meeqqanut atugassarititaasut pillugit apeqqutinnut qujanaq.

Tlf. (+299) 34 50 00
Fax (+299) 34 66 66

Qimarngueqarnermut tunngasut ineriartortinneqarnissaat pisariaqartinneqarmat Naalakkersuisut isumaqatigaat. Misissuinerit arlallit takutippaat ilaqutariinni nakuuserarneq annertooujussuusoq aammalu ilaqutariinni arnat tassaasut nakuusernermik eqqorneqarnerpaasartut. Taamaalilluni arnanut meeqqanullu nakuuserfigineqarsimasunut tapersiissutit pitsanngorsarnissaannut pisariaqartitsisoqarneranut qajannaatsumik tunngavissaqartoq ilimagineqarluni. Tassunga atatillugu qimarnguiit pingaarutilittut inissisimapput.

E-mail: ikinn@nanoq.gl
www.nanoq.gl

Illoqarfinni nunaqarfinnilu innutaasunut nakuusernermik eqqorneqartunut naammaginatummik neqerooruteqartoqarnissaata qulakkeerneqarnissaa kommunit akisussaaffigaat. Maanna neqeroorutigineqartartut pisariaqartitsinermik naammassinnittut Naalakkersuisunit isigineqanngillat. Nakuuserarneq akiorniarlugu periusissamik iliuusissatullu pilersaarummik nuna tamakkerlugu suliniutinut nukittorsaataasussanik UPA 2013-imi Naalakkersuisut saqqummiussinissaannut tamanna tunngavigineqarpoq. Iliuusissatut pilersaarut ilaatigut qimarnguinnut tunngasut ineriartortinneqarnissaannut pilersaarummik imaqarpoq.

Kommunit qimarnguillu suleqatigalugit ineriartortitsinissamut pilersaarusiornissaq Naalakkersuisut kissaatigaat. Pilersaarummi siunertarineqassaaq kommunit ullumikkut qimarngueqanngitsut qimarnguinnik pilersitsinissaat aammalu maanna qimarnguiit nukittorsarneqarnissaat.

Arnanut taakkulu qitornaannut nakuusernermik nalaataqarsimasunut ataavartummik allannguutaasussanik tapersiissutissanik qimarnguinnit siunissami neqerooruteqarfiusarnissaat Naalakkersuisunit anguniarneqarpoq. Tamanna isumaqanngilaq qimarnguiit aningaasaqarnikkut sulisutigullu nukissanik amerlanerujussuarnik tunineqartariaqartut. Anguniakkap ilaa qimarnguiit akornanni assigiinngitsunik suliallit akornanni suleqatigiinnerup annertusarneratigut aammalu najukkani isumaginninnikkut neqeroorutit allat nukittorsarnerisigut piviusunngortinneqarsinnaassagunarpoq.

Qimarnguinnut tunngasuni kisitsisit assigiiaanngillat, kisitsisilli takutippaat meeqqat 300-t missaanniittut 2011-mi nuna tamakkerlugu qimarnguinni arfineq marlunni

najugaqarsimasut. Nuummi qimarnguimmit ukiumoortumik kisitsisitigut paasissutissat takutippaat arnat 42-t aammalu meeqqat 46-t 2011-mi qimarnguimmiissimasut. Meeqqat 86 %-iisa anaanartik nakuuserfigineqartoq takusimavaat tusaasimalluguluunniit.

Meeqqat nakuusernermik eqqorneqartut annertuumik unammilligassaasutut qimarnguinni sulisunit misigineqartarnerat akulikippoq¹. Angerlarsimaffinni nakuuserneq meeqqanut sunniuteqartarpoq qimarnguillu taakkuninnga sulissutiginninnissamut suliatigut nukissat amigaatigaat. Pingaartumik nukappiaqqat makitasoorujussuarmik pissuseqalerajupput. Taamaalilluni ilisimatusarnermi suut paasineqarnerisut qimarnguinni ulluinnarni pisut takutippaat: Tassalu ilaqutariinni nakuuserfiusartuni meeqqat namminneq inersimasunngorunik nakuusertunngorsinnaanerminnut aamma/imaluunniit nakuuserfigineqalersinnaanerminnut annertuumik navianartorsiorlut.

Meeqqat qimarnguinnut inissittut nammattakkamik ilaatigut kigutigissaammik, sininnermi atisanik pinnguanillu imaqartumik tunineqarnissaat Mary Fonden aammalu LEGO Fondenimit isumagineqarpoq. Danmarkimi qimarnguinni misilittakkat takutippaat meeqqat qimarnguinnut inissittut affaasa missaat angerlarsimaffimminnit nassataqarnatik takkuttartut. SFI-mit naliliinerup takutippaa nammattagaq nuannaartitsisarpoq aammalu angerlarsimaffimmi misigisat pillugit meeqqap oqaloqatiginissaanut ajornakusoortumut aallaavissaasoq pitsaasoq.

Nakuusertarnerulli kaaviiarnerata unitsinnissaa anguniarneqassappat qimarnguinni meeqqanut maanna neqeroorutaasartut naammanngillat. Meeqqat suliamik ilisimasaqarluartunit ikiorneqarsinnaassapput, soorlutaaq ilaqutariit nakuusernermik eqqorneqartut tamarmik akuliunneqartariaqartut. Tassami angerlarsimaffimmi nakuusertarneq ingerlaannarpat meeqqat tarnikkut inooqataanikkullu suliniuteqarfiginissaat periarfissaqassanngimmat.

Aamma ilaqutariit nakuusernermik eqqorneqartut eqqarsaatigalugit siusissuklut ataatsimoortumillu isiginnilluni suliniuteqarnissaq pingaaruteqarpoq. Taamaattumik qimarnguinnik ineriartortitsinissamik pilersaarut sunniuteqatigiinnissaq siunertaralugu assersuutigalugu meeqqanut inuusuttunullu iliuusissamut ilanngunneqartariaqarpoq.

Naalackersuisut suliasaqarfimmi suliniutinik aalajangersimasunik aallartitsinnginneranni qimarnguinnik ineriartortitsinissamik pilersaarutip utaqqimaarneqarnissaa kissaatigaat, taamaalilluni tamanna sapinngisamik annertunerpaamik paasissutissanik tunngaveqarluni ingerlanneqarsinnaanissaa pillugu. Taamaannerani nakuuserneq akiorniarlugu aammalu qimarnguinnut tunngasut salliutinuarlugit najukkani suliniutinik nalileeqqullugit kommunit qinnuiginiarpagut.

Qimarnguut ingerlanneqarneranni aningaasartuutit 50 %-iannut Naalackersuisut tapiissuteqartarput aammalu ataatsimeersuarnerit, pikkorissarnerit assigisaallu aqutugalugit sulisunik piginnaanngorsaanermut tapersiisarlutik. Tamatuma ingerlatiinnarnissaa siunertaraarput.

¹ 2009-mi ataatsimeersuarnermi 'Vold er ikke løsningen' ("Nakuuserneq aaqqiissutissaanngilaq") qimarnguut kattuiffiata siulittaasuata Regine Enoksenip saqqummiussaa. Ataatsimeersuarnermit saqqummiunneqartut il.il. www.nanog.gl-imi atuarneqarsinnaapput

Inussiarnersumik inuulluaqqusillunga

Mimi Karlsen